


27
MONT

DE COMETA IN VNI- VERSVM, ATQVE DE ILLO QVI anno 1577, uisus est, opinio Marcelli Squarcialupi Plumbinensis:

*Ad Ampliss. & sapientem virum ANDREAM
DVDITHIVM, Cæsaris Consiliarium.*



V N Q V A M dubitauī, Patrone clē
mens, vulgi Regnum (vide quām *vulgus la-*
honesto vtar verbo) esse magnum: *tē patens*
hoc est, quāmplurimos esse morta
les qui vulgi opinionibus delectē-
tur. Sed esse tantam copiam ho-
minum credulorum, nūquam po-
tui suspicari. Quis enim putet vi-
ros doctos mathematicos, physicos, theologos, item i-
psos, nō rarō ex medio vulgo esse? Attamen res ipsa vin-
cit inter eos qui literati habentur, & sunt, magnam esse
non rarō veritatis inscitiam. Atq̄ ita rem se habere, cum
alia multa, tum verò vnum istud nos docet, quōd multi
sunt, & iij quidē egregij viri, qui Cometa scribant, omi-
noscum quiddā esse, portentū esse, formidandā esse flam- *Communis*
mā, à qua tumultus, bella, seditiones, clades, generosi & error
heroici generis interitus, aliæ multæ pestes impendent.
Credas velim, amplissime vir, multos esse annos, cum
istam opinionem non solum non probauī, sed in animo
meo risi. Verūm hoc anno tam illustri Cometa viso, ac
sæpe diligenter obseruato, commune istud iudicium (si
tamen sine ratione iudicium) non possum non suspectū
habere. Et profectō, vel primis diebus cogitabam in hoc
argumentū aliquid ad meū usum differere: iamq̄ capita
questionis notabā, cū ecce tibi ab amicis hortatio, vt cur
rere studēti mihi calcaria senserim adhiberi. Scripsit Igla
via Ioh. Rucardus, phisicus insignis, et probitate singula-
ri vir, vt aliquid de Cometa. Rescribo me aliquid parare.
Interim certior siō, esse qui cōmentētur, et viros in primis

A 2